

**AMANAT TAHUN BARU 2017**  
**OLEH YB DATUK SERI DR. S. SUBRAMANIAM**  
**MENTERI KESIHATAN MALAYSIA**  
**DI**  
**PERHIMPUNAN PAGI KKM**  
**PADA 12 JANUARI 2017 (KHAMIS)**

---

Terima kasih kepada yang berusaha, saudara/saudari pengacara majlis,

YB Dato' Seri Dr. Hilmi bin Haji Yahaya,  
Timbalan Menteri Kesihatan Malaysia

YBhg. Dato' Seri Dr. Chen Chaw Min,  
Ketua Setiausaha  
Kementerian Kesihatan Malaysia

YBhg. Datuk Dr. Noor Hisham bin Abdullah,  
Ketua Pengarah Kesihatan Malaysia

YBhg. Timbalan-timbalan Ketua Setiausaha,

Ybhg. Timbalan-timbalan Ketua Pengarah Kesihatan,

Ybrs. Pegawai-pegawai Kanan Kementerian,

YBhg. Datuk-Datuk, To' Puan, Datin-Datin,

Tuan-tuan dan Puan-puan yang dihormati sekalian,

Selamat Pagi, Salam Sejahtera dan Salam Sihat 1Malaysia!

1. Terlebih dahulu, saya ingin mengambil kesempatan keemasan ini untuk mengucapkan Selamat Tahun Baru 2017 kepada semua

warga Kementerian Kesihatan. Saya juga ingin mengucapkan syabas dan tahniah di atas komitmen padu, segala khidmat bakti dan sumbangan yang telah diberikan dalam merealisasikan pelbagai program dan aktiviti yang telah dirancang pada tahun 2016. Semoga tahun baru ini akan menyaksikan peningkatan yang lebih memberangsangkan lagi di dalam usaha murni kita untuk merealisasikan Visi Kesihatan Malaysia, iaitu “Negara mengembleng tenaga ke arah kesihatan yang lebih baik”.

Hadirin sekalian,

2. Pada tahun 2017, KKM akan terus mengorak langkah untuk menunaikan amanat YAB Perdana Menteri Malaysia supaya menjadikannya sebagai tahun penyampaian, iaitu dalam erti kata lain, kita sebagai penjawat awam perlu “deliver”, demi kesejahteraan rakyat. Memetik kata-kata YAB Perdana Menteri, “Penyampaian bukan sahaja dari segi fizikal tetapi kita perlu pastikan ia mempunyai nilai kepada rakyat, pastikan bahawa segala projek, bantuan dan program yang telah dirancang sampai kepada rakyat. Bagi mencapainya, kita perlu kepada perubahan cara pemikiran, para penjawat awam perlu fokus kepada perkhidmatan usaha, latihan, penambahan nilai dan segala-galanya untuk kebajikan rakyat”.
3. Sehubungan itu, saya ingin menyeru semua warga Kementerian Kesihatan untuk bersama-sama meningkatkan komitmen dalam menjalankan tugas dan juga memperbaharui azam untuk memberikan perkhidmatan kesihatan yang berkualiti tinggi, iaitu perkhidmatan yang selamat, berkesan, berpaksikan pelanggan, saksama, efisien dan menepati waktu atau “timely”.

4. Perkhidmatan yang kita berikan mestilah juga mempunyai ciri-ciri keprihatinan dan penyayang atau “caring”, sesuai dengan moto kita, “Kami Sedia Membantu” dan “To Cure Sometimes, To Relieve Often, To Comfort Always”. Anggaplah pesakit serta keluarga mereka seperti keluarga kita sendiri. Jangan lupa juga dua prinsip penting di dalam penyampaian perkhidmatan yang berkesan iaitu CTI (Cepat, Tepat, Integriti) dan PCI (Produktiviti, Kreativiti dan Inovasi). Oleh itu, sama-samalah kita berganding bahu serta bekerjasama sebagai satu pasukan yang mantap untuk memberikan perkhidmatan yang terbaik kepada rakyat serta mencapai “outcomes” yang diidami mereka.

Tuan-tuan dan puan-puan,

5. Seperti yang kita semua sedia maklum, YAB Perdana Menteri Dato’ Sri Mohd Najib bin Tun Abdul Razak telah membentangkan Bajet 2017 pada 21hb Oktober 2016. Peruntukan sebanyak RM24.8 bilion telah diluluskan bagi Kementerian Kesihatan, iaitu peningkatan sebanyak 7.7% berbanding tahun 2016. Bagi **Belanja Mengurus**, terdapat **peningkatan** sebanyak 9.5% iaitu daripada RM21.431 bilion pada tahun 2016 kepada RM23.462 bilion pada tahun 2017 manakala bagi Belanja Pembangunan pula, terdapat **penurunan** sebanyak 16.4%, daripada RM1.6 bilion pada tahun 2016 kepada RM1.338 bilion pada tahun 2017.
6. YAB Perdana Menteri dalam pembentangan bajet tersebut juga ada menyatakan bahawa Kerajaan sentiasa komited terhadap tadbir urus ekonomi yang terbaik melalui perbelanjaan berhemah, walaupun negara berhadapan dengan ketidaktentuan ekonomi dunia. Sehubungan itu, saya berharap KKM akan sentiasa

berhemah dalam perbelanjaan dengan menggunakan pendekatan yang kreatif dan inovatif untuk lebih efisien serta mengelakkan pembaziran.

7. Oleh itu, setiap aktiviti atau program haruslah disusun semula mengikut keutamaan yang menyumbang kepada pencapaian *outcome*, sejajar dengan objektif RMKe-11 serta Pelan Strategik KKM. Saya juga berharap agar mutu perkhidmatan yang disediakan KKM kepada rakyat sentiasa diutamakan dan produktiviti KKM dapat dipertingkatkan supaya *sustainable* dari segi kewangan.
8. Langkah-langkah penjimatan yang telah dilaksanakan pada tahun 2016 akan diteruskan pada tahun ini dengan mengambil pendekatan kreatif dan inovatif melalui *National Blue Ocean Strategy (NBOS)* seperti mereka bentuk semula proses kerja (*process re-engineering*) dan *value-based management*, yang dijangka akan dapat mengoptimumkan perbelanjaan KKM.
9. Sebagai usaha Kementerian Kesihatan untuk memastikan agar perkhidmatan yang disediakan menjadi lebih mapan serta responsif, sejajar dengan perubahan persekitaran dan keperluan rakyat, Pelan Strategik dan Pelan Tindakan KKM (2016-2020) telahpun dibangunkan untuk memartabatkan sistem kesihatan.
10. Saya berharap agar semua warga Kementerian Kesihatan mengambil langkah-langkah yang telah digariskan serta berganding bahu bagi menjayakan pelan tersebut, sekaligus membantu menjadikan Malaysia sebagai sebuah negara maju berpendapatan tinggi menjelang tahun 2020.

Hadirin sekalian,

11. Kementerian akan mempertingkatkan lagi usaha untuk menangani masalah Penyakit Tidak Berjangkit yang sangat membimbangkan di negara ini dengan pengukuhan program KOSPEN dan lain-lain lagi, selaras dengan pelan strategik yang berkaitan. Kementerian juga akan meningkatkan kadar pengesanan kes penyakit tuberkulosis (Tibi) dan memastikan semua pesakit dirawat sehingga sembuh. Selaras dengan matlamat *World Health Organization* (WHO) untuk menamatkan epidemik Tibi (*TB Eradication*) dalam '*End TB Strategy 2035*', Kementerian akan memfokuskan kepada dua aktiviti utama iaitu:
  - (i) Meningkatkan pengesanan kes tibi secara aktif (ACD) melalui program saringan golongan berisiko tinggi (*high risk group screening*) dengan kaedah X-Ray dada (CxR); dan
  - (ii) Memperkukuh serta mempertingkatkan pencapaian program saringan dan rawatan bagi mereka yang dijangkiti tibi (*latent TB infection / LTBI*) dalam kalangan golongan tertentu.
12. Negara juga masih berdepan dengan cabaran dalam menangani kes malaria walaupun kes malaria jangkitan tempatan menunjukkan tren penurunan yang memberangsangkan, namun, ianya perlu ditangani dengan rapi. Lantaran itu, Pelan Strategik Eliminasi Malaria Kebangsaan 2011-2020 yang telah dilaksanakan sejak tahun 2011 lagi telah menetapkan sasaran bagi seluruh negara untuk bebas dari kes malaria jangkitan tempatan mulai tahun 2017. Harapan Kementerian Kesihatan

adalah agar sasaran ini dapat dicapai dan seterusnya melayakkan Malaysia untuk mendapat pensijilan pihak WHO sebagai negara yang diiktiraf bebas malaria pada tahun 2020.

13. Cabaran utama adalah risiko pengenalan semula jangkitan malaria. Pada masa yang sama, kejadian malaria jangkitan tempatan yang berlaku di kalangan populasi berisiko seperti Orang Asli di negara ini perlu ditangani secara komprehensif. Oleh itu, penglibatan komuniti sebagai sumber *Public Health Intelligence* adalah penting dan perlu dipertingkatkan bagi memastikan sasaran eliminasi malaria menjelang tahun 2020 tercapai.

Tuan-tuan dan puan-puan,

14. Sebagai sebahagian daripada strategi Pemantapan Kesihatan Bandar, perkhidmatan Klinik 1Malaysia (K1M) akan terus diperkukuhkan dengan memastikan agar penduduk miskin bandar tidak ditinggirkan. Perkhidmatan ini akan diperluaskan dengan menempatkan Pegawai Perubatan di Klinik-klinik 1Malaysia yang baru dibina dan klinik-klinik yang mempunyai kadar kehadiran pesakit yang tinggi. Bagi menangani isu penyakit diabetes dan hipertensi yang semakin meningkat, perkhidmatan rawatan susulan penyakit tersebut akan diperluaskan ke K1M di seluruh negara secara berperingkat.
15. Selain itu, bagi mengurangkan masa menunggu di fasiliti kesihatan primer, Sistem Panggilan Kecemasan melalui panggilan telefon atau sistem pesanan ringkas (SMS) telah diperkenalkan. Selain itu, Sistem Pengurusan Pesakit (SPP) telah dilaksanakan di 10 buah hospital dan fungsinya akan dimantapkan dan

dilengkapkan bagi membangunkan *Health Information System@KKM* (HIS@KKM). HIS@KKM akan dilaksanakan secara rintis di Hospital Raja Perempuan Bainun (HRPB), Ipoh pada tahun 2019.

16. Bagi mengukuhkan kawalan penyakit pergigian, strategi pengesanan awal penyakit pergigian akan dipertingkatkan, selaras dengan sasaran utama **Pelan Kesihatan Pergigian Kebangsaan (*National Oral Health Plan – NOHP*) 2011-2020**. Pelaksanaan projek *pilot Modified MOH International Caries Detection and Classification System (Modified MOH ICDAS)* akan diperkukuhkan di sekolah-sekolah rendah terpilih di seluruh negara.

Hadirin yang dihormati sekalian,

17. Negara kini sedang menghadapi cabaran “*double-burden of malnutrition (over and under nutrition)*” di mana kadar prevalens obesiti dan Penyakit Tidak Berjangkit berkaitan pemakanan semakin meningkat di kalangan setiap lapisan umur. Selain itu, peningkatan masalah kekurangan pemakanan terutamanya masalah bantut dalam kalangan kanak-kanak juga semakin membimbangkan di mana berdasarkan Kajian NHMS 2015, sebanyak 17.7% kanak-kanak bawah umur 5 tahun adalah terbantut. Sekiranya masalah ini tidak dicegah melalui amalan pemakanan yang baik sejak kecil lagi, ianya akan memberi kesan terhadap tumbesaran kanak-kanak, sekaligus meningkatkan risiko obesiti.

18. Lantaran itu, Pelan Tindakan Pemakanan Kebangsaan Malaysia (*National Plan of Action for Nutrition*) NPANM III, 2016-2025 yang dilancarkan pada 29 November 2016 telah dirangka selari dengan hala tuju agenda pemakanan di peringkat antarabangsa dengan mengambil kira status pemakanan semasa dalam negara. NPANM III juga merupakan salah satu usaha berterusan dalam menyelesaikan masalah *double-burden of malnutrition* ini.
  
19. Satu strategi baru dalam NPANM III iaitu “**Memastikan Jaminan Kebolehdapatan Makanan dan Pemakanan**” adalah bagi memperkukuhkan sistem makanan yang mampan serta mempromosikan pemakanan sihat di pelbagai peringkat. Ianya diharapkan dapat dilaksanakan melalui usaha bersepadu daripada setiap pihak yang terlibat.

Para hadirin sekalian,

20. Penglibatan Malaysia di dalam Codex, iaitu badan yang menyediakan standard makanan antarabangsa telah memberi manfaat besar dalam menjaga kepentingan dan perdagangan makanan negara. Saya difahamkan bahawa Kementerian Kesihatan akan menganjurkan dan mempengerusikan Mesyuarat Sesi ke-25 *Codex Committee for Fats and Oils* (CCFO) di Kuala Lumpur pada 27 Februari hingga 3 Mac 2017. CCFO ini akan bertanggungjawab dalam menyediakan standard dunia berkaitan lemak dan minyak dari sumber haiwan, sayuran dan marin termasuk marjerin dan minyak zaitun.

21. Selain itu, sebagai satu inisiatif untuk memartabatkan bidang Perubatan Tradisional & Komplementari (PT&K) di Malaysia, Kementerian ini juga telah memulakan usaha untuk membangunkan satu '*Blueprint PT&K*' Kebangsaan bagi tempoh 10 tahun, dari tahun 2018 hingga tahun 2028. Perancangan pembangunan *Blueprint* ini juga sejajar dengan RMKe-11 bagi Mentransformasi Sektor Perkhidmatan (Penjagaan Kesihatan Swasta) serta usaha Pertubuhan Kesihatan Sedunia (WHO), yang menggalakkan negara ahlinya untuk mencapai *strategic objectives* dalam WHO *Traditional Medicine Strategy 2014-2023*.

Tuan-tuan dan puan-puan sekalian,

22. Kementerian akan terus mengambil langkah dalam mengoptimumkan sumber manusia dalam pengurusan kesihatan kesihatan selaras dengan Dasar Pengejatan Saiz Perkhidmatan Awam. Langkah strategik yang dilaksanakan adalah menerusi penjajaran semula perjawatan, penstrukturan semula dan perubahan dasar baru pelantikan bagi skim Pegawai Perubatan, Pegawai Pergigian dan Pegawai Farmasi.
23. Selain itu, Kerajaan juga telah bersetuju untuk mewujudkan lapisan baru Gred UD56 dan UG56 bagi Pegawai Perubatan Pakar dan Pegawai Pergigian Pakar di Kementerian Kesihatan. Langkah ini adalah selaras dengan usaha murni Kerajaan untuk memberikan insentif kepada pakar perubatan/pergigian supaya terus berkhidmat dengan Kementerian di samping menyediakan perkhidmatan kepakaran yang berkualiti kepada rakyat. Selain itu, inisiatif ini dilihat sebagai salah satu langkah penambahbaikan laluan kerjaya Pegawai Perubatan/ Pergigian Pakar.

24. Sebagai motivasi dan galakan bagi warga Kementerian untuk bertugas di pedalaman, bilangan fasiliti yang layak mendapat kadar Elaun Kesusahan Mengikut Lokasi Tahap Kesusahan (EKMLTK) sebanyak RM1,500.00 sebulan telah meningkat kepada 81 fasiliti berbanding dengan hanya 40 fasiliti sebelumnya. Ini adalah hasil penilaian semula lokaliti yang berkeelayakan dan pembayaran insentif ini telah berkuatkuasa mulai 1 Disember 2016. Selain itu, bagi memberi galakan kepada pakar untuk terus berkhidmat di Sabah dan Sarawak, Kerajaan telah meluluskan Bayaran Insentif Penempatan Pakar Perubatan/ Pergigian (BIPP) yang berkhidmat di Sabah dan Sarawak berkuatkuasa mulai 1 Julai 2016.

Tuan-tuan dan puan-puan sekalian,

25. Saya ingin menyeru semua warga Kementerian Kesihatan agar bersama-sama berganding bahu dan berjuang demi kesejahteraan dan pembangunan negara ini. Berikanlah perkhidmatan yang terbaik kepada rakyat dan tunjukkanlah kepekaan kita terhadap keperluan dan ekpektasi rakyat.
26. Sesungguhnya, sistem perkhidmatan kesihatan yang inovatif dan mampan adalah sejajar dengan aspirasi Malaysia untuk mencapai status negara maju dan berpendapatan tinggi menjelang tahun 2020. Oleh itu, teruskanlah kecemerlangan budaya kerja tahun ini dengan berpaksikan kepada 3 nilai teras Budaya Korporat KKM iaitu Penyayang, Profesionalisme dan Kerja Berpasukan.

**Sekian, terima kasih.**

